



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

Пренумерата в краю:

30 грошей місячно,
80 „ квартално,
1.50 „ полрочно,
3 зл. рочно.

В Америкі: 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., $\frac{1}{2}$ сторони 60 зл., $\frac{1}{4}$ сторони 35 зл., $\frac{1}{8}$ стор. 20 зл., $\frac{1}{16}$ стор. 10 зл.; оголошення малы за 1 мм. 20 гр., в тексті 30 гр., перед текстом 40 гр. При місячном и долгом оголошеню значна знизка.

Конто чекове Нр. 404.155.

Выстава в Дании.

Коло Копенгагы, столицы Дании уряджено в том році велику выставу рольничу. Выставу тоту сорганізовано в память 150-літ знесеня паньщины в Дании. Перед 150 роками хлопы в Дании вели колективно господарства рольны, то значит, якаси група селян впольно сіяла зерно и впольно зберала землеплоды. Было тоту причином неустанных процесов и взаимной ненависти. 150 літ тому король Дании выдал декрет, котрым змінил тот способ сельского господарства. На основі того декрету роспарцельовано много грунтов великих земских маетков и поділено грунты громадскы. Каждый хлоп достал в означеном місци грунт и стал ся его неподільным властителем.

От того часу змінил ся вигляд села в Дании. Хлопы повыходили с родинних сел и закладали новы господарства на новых власных теренах. Прото тыж в Дании ніт таких сел, як у нас, где бы хата стояла коло хаты; там сут хаты росшмарены, далеко одна от другой, а коло каждой хаты ест прекрасно удержанный сад и грунт, належачий до властителя той хаты.

Не лем внішний вигляд села змінил ся от часу знесеня паньщины. Змінил ся также способ веденя сельского господарства, а с ним и добробыт хлопа. До часу знесеня кріпацтва хлоп в Дании бідовал и жил в низких, темных, брудных и нездоровых хатах. Скот его был забідженный и містил ся также в низких, темных и непродувных стайнях. Бідовал втот час хлоп, бідовала также его худоба. Образок с тых часов ест представленый на выставі под Копенгагом. Ест там побудована нужденна хыжка с перед 150 літ, видно там также бідну, низку стаенку и брудне обысте.

Недалеко той хыжки стоит ясна, чиста, о великих окнах хата днешного хлопа. Коло хаты стоят добре удержаны господарскы будынки, на обыстю рольничы знаряды и машины, за хатом огород яринный и сад, а дальше тягнут ся поля, на котрых робят роботники. Земля добре погноена, оброблена новочасныма знарядыма, золотисты, тяжкы колосы просят ся сами под жнивьярку, ярины, як бы на показ, а овочевы дерева гнут ся под тягаром овочей.

Але найкрасше выглядят там стайні и худоба. Аж блищат ся от чистоты. Всяди сонце, продув, уміле и доцільне выкористане місца. Молоко, о высоком проценті толщю, относит каждый сейчас по выдоиню до кооперативной молочарні, котра перерабят его на высококачественне масло, сыры и сметану и отдае назад тоту продукты хлопю, або за его згодом продае их в місті.

В загалі кооперативы полагаджуют там всі хлопскы sprawy. При их посередництві продае там хлоп худобу, молоко, яйца, зерно и другы землеплоды, кооперативы также привозят ему одеж, обув, опал, книжки, рольничы знаряды и всьо, чого он в господарстві потребуе.

Тот цілый рух кооперативно-рольничий представленый ест на выставі вірно и без пересады. Можна ся легко о том перекопати, выїзджаючи до першого ліпшого села в Дании. Там увидит каждый тоту само, што на выставі, а кромі того прекрасны народны до-

Нашим Почтенным Читателям!

Администрация Лемка просит всіх влатити пренумерату за 1938 рок. Пренумерату належит переслати розрахунковым переказом, який треба вирізати с третьей стороны днешного числа.

мы, хлопскы университеты, публичны библиотеки, купальны дома и т. д. Там народ зрозуміл потребу науки до той степени, же не треба его до того примушати. Наука стала ся там внутреннем потребом хлопа так як ішло и отпочинок по роботі.

Ище одно, што звертат на себе увагу каждого, кто їздит по селах в Дании. Там всі люде сут веселы и усміхнены.

„Смія ся! Увидиш, як приятна ест втотчас каждая работа, як миле окружающе товариство, як веселый ест світ и як добры сут люде. Так говорят люде в Дании и сміют ся все весело.

Той веселости, той радости життевой бракуе нам може длятого, же ніт у нас сильной селянской организации, котра дае добробыт хлопам в Дании.

Нова школа в Горлицах.

Заряд міста Рорлиц достал позволене на открыте приватной гимназии коедукационной (для хлопцов и дівчат) и открыват по ваканциях клясу першу и другу.

До той гимназии могут вписати ся всі тоты, котры перед ваканциями здали вступный экзамен и с браку місца не были приняты до державных гимназии, а также тоты, котры не здали перед ваканциями экзамену, если по ваканциях тот экзамен здадут.

Такса за науку выносит засадничо по 30 злотых місячно, але селяне и біднійши родичи достанут знизку до 20, а може и до 15 злотых місячно. В першой клясі отже не буде никакой рижницы меже оплатом в державной и приватной гимназии, бо в державной гимназии в першой клясі не знизают также никому оплат за науку. В виду такого поставленя sprawy оплат в приватной гимназии в Горлицах, грошево коштуе удержане ученика праві так само, як и в державной гимназии.

Гимназия приватна мае обезпечены права державных школ, отже селяне, отдаючи своих дітей до той гимназии, нич не тратят.

Также в Крыниці повстае по ваканциях приватна гимназия. До того часу были там лем гимназияльны курсы, які провадил спенсионированный дыректор гимназии д-р Моленда. Курсы тоты не мали нияких прав. Прото тыж нашли ся в Крыниці люде, котры завязали „Т-во Приятелей Гимназии“ и тоту товариство достало позволене на открыте приватной гимназии. По ваканциях буде открыта кляса перша, а може также и высши. Селяне с окрестности Крыницы могут посылати свои діти до той гимназии.

Великы зливы в Югославии. По великих опеках пришли в Югославии страшны зливы, в часі котрых вода заляла великы пространства земли в Босні. Шкоды сут огромны.

ПЕРЕСАДА.

Прекрасна то річ чистота и порядок, мила то незвичайно річ мати все нову одежу и быти все чисто и парадно прибраным. Здає ся, же ніт чоловіка, котрый не хотіл би ся выпарадовати, ніт чоловіка, котрый не хотіл бы мешкати в прекрасной хаті и ніт такого, котрый не хотіл би собі все добре поісти. Але, як ніт за што купити парадной, новой одежи, то мусит ся и стару сшивати и латати, ніт колача, мусит ся и чорный хлібец закусити и водом попити. Иншими словами, каждый мусит так жити, як го стати и лем жите в границах своих возможностей дає запоруку тревалости и солидности.

Сут однак річи, котры при охоті и доброй волі, може каждый зробити, так бідный, як и богатый. До таких річей належит чистота и порядок. Полатана и посшивана одежа буде также мила, як буде она все чиста. Так само и біднька хата, лем бодай мала чисты стіны, окна, дверы и дылины, буде все милым місцем перебування для властителя и его гостей. Коли дорога и ціле обысте будут все заметены, зробит тото миле вражене на каждого, кто прийде на тото обысте. Чистота нич не коштує, лем кус доброй волі, охоты и роботы, а дає незвичайно много користей, бо в чистой хаті не гніздит ся хробацтво, бо там люде сут здоровы.

Тоты користи мал напевно на мысли г-н. премьер ген. Складковский, коли выдавал заряджене о естетичном (красном) вигляді хат, обысть и загород. Заряджене само ціле, користне и виховавче, бо ним хотіл г-н. премьер призвычати люде до чистоты в хаті и на обыстю, а также змінити на лучше вигляд сел и міст, котры на загал виглядають брудно и немило. Зрозуміла річ, же переведене таких змін вымагат долшого часу и не даст ся перепровадити в пару днях. Притом заряджене не мало ціли нищити люде ани им докучати, а лем приучати их до звернення увагы на чистоту и красу сельских загород и містовых домов.

Тымчасом выконане того зарядженя в многих місцевостях стало ся причиною знищення, а часом аж и несчастья. Илюстр. Куриер Цодзенны подає, же оден бідный хлоп со Славикова коло Тржемешна повісил ся, бо будовельны місцевы власти приказали ему збурити стодолу и не помогли мольбы и просьбы хлопа, котрый не мал за што побудовати новой стодолы и до чого зложити сіна и зерна. Хлоп загрыз ся так, же по розбуреню стодолы повісил ся. В Крыниці не дошло до так несчастных случаев, але и ту люде наричут страшно. Комисия Здроева, а властиво пан инженер Винклер также не числит ся цілковито с возможностями хлопа и ексекує без жалостно свои нераз нецілевы и занадто дороги зарядженя. Знаний ест случай, же хлоп достал приказ розбурити до трох дней шопу и ганок коло хаты, хоц термин внесеня рекурсу предвиджений ест тым самым писмом 14 дневный. Хлопу прислугує отже право рекурсу в 14-ох днях и можливе, же в дорозі рекурсу справу бы выиграл, але штож му с того, як шопы и ганок мусят быти розбурены до трох дней. Кроме того п. инженер цілковито не входит в того, же под ганком ест вход до пивницы и в разі збуреня ганку треба — або позбыты ся пивницы, (треба дверы до ней замурувати), або треба буде входити до хаты по драбині. Зрештом, здає ся, же ганок ест прикрасом дому, а што именно ходит на основі министеряльного зарядженя — и прото не належит его бурити, а радше перебудовати, если потреба того вымагат.

В иншом выпадку приказала будовельна комиссия в Крыниці прикрасити хлів всаджаныма в бетон каменями. Зроблено тото видно в той ціли, штобы жиючи в хліві свині выбрабляли собі естетичный змысл, бо поза свинями и так того никто не видит, бо хлів стоит за господарскыма будынками. Тот вымысел коштувал понад 200 зл. тяжко зароблений кырвавицы.

Трудно подавати всі случаи, с котрых ясно пробиват одна правда: Будовельна комиссия в Крыниці не числит ся цілковито с материяльными возможностями села и выає

часто зарядженя, котрых люде не могут выполнити не прото, штобы не хотіли, а для того, бо не стати их на тото. Повстає непотребне невдоволене и нарікане, котрого не было бы напевно, если бы до справ порядковых и будовельных подходити житево, а не параграфово, а же так належит их полагоджати, свідчит о том нове заряджене г-на премьер ген. Складковского, в котром поручат в селах и місточках о характері рольничом вздержати порядковы роботы на час спішных работ полевых.

950-літний ювілей Крещеня Руси в Сяноці.

Дня 10. т. м. отбыло ся торжество, посвячене памяти 950-літя крещеня Руси.

Помимо уливного дожджа на торжество приїхало много интеллигенции и народа. Дождж однак перешкодил отслужити св. Литургию и крещене воды на полях над Сяном и богослужене отбыло ся в церкви в Сяноці. Службу Богу и водосвяте отправил Владыка для Лемковщины Ексц. Медвецкий при соучастии многих священников. Співал прекрасно сяноцкий хор под руководством г-на Ропицкого.

Вечером в салі роботничого дома отбыла ся академия и концерт. В прекрасно высказаной бесіді подчеркнул г-н Ник. Гукович, профессор гимназии в Сяноці, слова великой

правды, же народ може удержати лем одна церковь, лем одна религия.

На концерт, приготовленный г-ном Ропицким, зложил ся ряд прекрасных народных світских и церковных пісней, серед котрых найсильніше враженя зробила пісня „Плотыны...“ отспівана О. Емилияном Венгрыновичем при акомпанияменті хора. По отспіваной пісні переполнена саля аж затрясла ся от рукоплесканя. Чудно выпали и други пісні, што зрештом не было несподіванком для тых, котры знали, же концерт приготовлят г-н Ропицкий.

По-концерті отбыла ся в міщанской салі забава с танцами, где бавлено ся весело до білого рана.

По році войны японско-кытайской.

Уж рок минул от часу рспочатя войны японско-кытайской. Япония оголосила листу втрат обох сторон. Втраты тоты выносят:

Кытайцы втратити: пол милиона убитых и коло 800 тысяч раненых, 180 тысяч карабинов, 6.685 легких и 2.078 тяжелых армат, 77 армат противлетничих, 13 армат противпанцерных, 275 чолгов и панцерных самоходов, 6 полевых радио-станций, 1.073 самолетов, много карабиновой и арматной амуниции и 43 пароходы.

Япония втратила: 37 тысяч убитых, 89 самолетов и 2 кораблі. Загалом на кытайских водах погыбло 1.110 офицеров и рядовых мо-

ряков. Кытайскы втраты сут ище векши, бо край ест знищений и згынули сотні тысяч цивильного населения, котре втопило ся по сорваню греблей на ріках кытайских. Война заносит ся ище на долго помимо, же Япония zdobyла в Кытаю 1.249.000 километров квадратных, отже пространство 3 раз векше от Польши и Японии, со 132 милионами населения.

Кытайский маршал Чанг-Кай-Шек заповідат войну до остатного вояка. Одновременно Японию выдал обявление до японского народа, в котром зазначил, же война закончит ся аж втотчас, коли Япония осягне свои ціли в Кытаю.

Хлопы против совітскому порядку.

Хлопы в Росии мают уж дост большевицкого раю и зачинают ся организовати и ставляти чинный отпор. Рух тот приберат чимраз ширши круги и стає ся опасный для совітского порядка.

Недавно отбыл ся в Ленинграді (давный Петроград) процес великой хлопской группы террорыстичной. Члены той группы вели агитацию против коллективизации и организовали замахы на председателей ославленных колхозов. Всіх оскарженных засуджено на кару смерти.

Каждого дня приходят висти о розстрілі совітских достойников. В звязи с утечом начальника Г. П. У. на Далеком Выході, Самойловича, о чом писали мы уже в попередном числі, арештовано много высших урядников, с котрых 20-ох розстріляно яко контрреволюцинеров.

Попал в немилость также „перший кавалерист червоной армии“ маршал Буденный, а также сам начальник коминтерна Димитров. Ему зашмаряют слабы результаты в чужих державах и неудачу в Испании. Англицы га-

зеты доносят, же арештовано также Шапошников, котрый был начальным политическим комиссаром совітских морских сил.

Совіты представляют ся тепер, як одна велика вязница, наполнена передовсем хлопами и роботниками.

С войны в Испании.

Уж близко 2 roky от рспочатя домашней войны в Испании. Два roky ліє ся братерска кров, пропадат народне добро. Война тота добігат уж до конца, бо повстанчи войска генер. Франко посувають ся безперестанно наперед. В гдеяких місцах находят ся они о 10 кильометров от Валенции головного центра правительственных сил.

ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО“.

Што чути в світі и в краю

Кара смерти за шпйонство во Франци. Француске правительство оголосило декрет, предвиджающий кару смерти за шпйонство и ділане на шкоду державы.

Стрїляли на весїлю и спалили ціле село. В місцевості Сан Педро до Рио в Португалії в часі весїля стрїляли дружбы на весїлю слїпыма патронами и запалили солому коло хаты. Огонь обнял скоро цілу хату, а от ней заняли ся други дома. Жертвом пожара впало парудесят хат с забудованями, худоба и собраный хлїб. Втраты сут великы.

На очах людей крокодыль пожер дітину. Коло села Шалляль в горїшном Егїпті крокодыль порвал с громады купающих ся дітей одну дітину и пожер ю на очах людей, котры надбїжали над ріку. В том році в Нїлю появило ся много крокодылей.

До чого провадит пятыка. В ночи на 13-го липня в Крыницї селї по цілоночной пятыці пришло до биткы меже компанями забавы, в часі котрой покалічено сильно пару людей. Биткы в часі пятыкы в Крыницї трафляють ся дост часто, в послїдних літах, што ест барз смутным обявом здичиня обычаев у молодежи.

Замах, чи охота вычистити черевыкы. В часі переїзда през. Злученых Стейтов Полн. Амерыкы Рузвелта через місто Олягома якыйсь тып старал ся вскочити до самоходу президента. Оден с полициянтов не допустил до того, ударяючи напастника пястуком в голову. Стояча на улицах міста толпа людей шмарилася на напастника и хотїла его убити. Лем с трудом удало ся полициї освободити напастника с рук толпы.

Переслуханий на полициї напастник заявил, же не мал он нияких злых намерень, а лем хотїл очистити черевыкы президентови.

Вывласнене копальнь угля в Англии. В Англии всі копальні угля сут власностю prywatных людей, котры тягнут с того великы доходы. Англицке правительство хоче выкупити тоты копальні и внесло до англицкого сейму проект вывласнення тых копальнь. Сейм, выбераний через людей, проект тої прийнял. Але сенат, зложеный с багачей, меже котрыма ест много властителей копальнь, поробил в том проектї поправки и справу вернено знова до сейму. Сейм поправки отшмарил. Сенат може ище раз поробити поправки, але если Сейм другой раз отшмарит их, проект стае ся законом и богачи останут без копальнь.. Англицке правительство хоче запла-

тити за всі копальні угля 66 милионов фунтов штерлингов.

Процес о шпйонство совїтской агенткы. В Финляндии перед верховным войсковым судом станула З. Литвиниченко оскаржена о шпйонство в користь Совітов. Литвиниченко укончила универсытет и специальну школу шпйонску в Совітах и была выслана до Финляндии. Там, яко красавица, навязала она знакомства с офицерами и от них доставала потребны ей для шпйонских цілей відомости. Агентці грозит кара долголітной вязницы.

Бандыты порвали цілу раду и бурмиистра. В Мексыку, в місті Пуерто Каноя містова полиция злапала пару бандытов и отдала их в руки войсковых властей. Бандыты постановили отомстити ся за того и раз в ночи напали на місто и повытягали с постелей 10 радных и бурмиистра міста и порвали их. Бурмиистра найдено на другой день, висячого на дереві недалеко міста. Што зробили бандыты с 10-ома радными, не знати.

Падають масово пчолы. Зимны ночи, бурї, вітры и дожджи стають ся причином, же пчолы падають масово. Дотепер згинуло в том році парунадцет тысяч пней.

Засуджений на кару смерти бандыта втек с поїзда. С Кутна до Плоцка перевозила поїздом полиция закутого в кайданы бандыту Влодарчика, котрый за численны морды был засуджений на кару смерти. Коли поїзд переїзджал коло ліса, бандыта нагло выскочил окном с поїзда и счез в лісі. Заряджена пого-

ня не дала результату. Аж слїдуючого дня достал ся он в руки полициї.

Голодный бандыта вышол на край ліса и надыбавши бабу, звїдал ся ю о дорогу до Кутна. Баба, уздрївши кайданы и додумавши ся, кто то може быти, дала знати полициї, котра в коротком часі нашла змордованого Влодарчика. Влодарчик не боронил ся и дал ся забрати полициї.

Земельны газы коло Сандомїра и Тарнова. Перед пару місяцями натрафлено коло Сандомїра на слїды земельного газу. Тото заохотило до гляданя тых газов и має приступити ся там до верчиня. Также коло Томашова приступлено до пробных верчинь. Фаховы люде твердят, же попри газах буде также нафта.

Совіты маот заборонити праздновати 950-літний ювїлей крещеня Руси. В послїдних літах помимо гнобленя оживил ся сильно религийный рух в Росии. Тото явлене выкликало уселену борбу с религиом. Совітске правительство носит ся с наміренем **непозволити праздновати 950-літний ювїлей крещеня Руси**, якый хотїли обходити торжественно всі віруючи.

В послїдном часі **закрыто в Москві 15 церквей.** Остало открытых в цілой Москві лем 25 церквей, котры сут переполнены народом. В послїдних днях мал появиити ся заказ правити богослуженя в московском соборї, котрый хотят совітскы власти розбурити. Вість тота выликала серед вірных велике безпокойство.

Комунальна Каса Ощадности Повіта Краковского в Кракові

Рок основаня 1882.

ЦЕНТРАЛЯ КРАКОВ, УЛ. ПИЯРСКА 1.
тел. 115-97, 131-73, 101-03.

О т д і л е н я : К Р Ы Н И Ц А, тел. 112.
В Е Л И Ч К А, тел. 6.

Всі порученя входячи в область банковости.

ПОРУЧЕНЯ ДЕВИЗОВЫ
ПОРУЧЕНЯ БИРЖОВЫ
СХОВОК АВТОМАТ.

СУМА ВКЛАДОВ ПОНАД 35.000.000 ЗЛ.
МАЕТОК ВЛАСНЫЙ ОКОЛО 6.000.000 ЗЛ.

БЕЗОПАСНОСТЬ.

ДОБРЫЙ ПРОЦЕНТ.

Місце для писемных wskazówek, dotyczących tytułu wpłaty oraz okresu czasu, do którego wpłata się odnosi. Korespondencja, zawierająca treść inną, podlega opłacie przez naklejenie znaczka pocztowego w wysokości opłaty taryfowej.

Nr. Listy rozrachunkowej

wpisał

sprawdził

Nr. listy rozrachunkowej

dzień
nadania

(podpis sprawdzającego)

„Переказ вирізати и надати на почту разом з залеглом пренумератом за Лемка”.



Отвіт. редактор :
Гарас Громосяк в Крыницї.
Типографія А. Гольдмана
во Львові ул. Сикстуска 19.